

AKASHVANI AIZAWL
REGIONAL NEWS BULLETIN
HEADLINES (MORNING)

1. Congress Party chuan Lengpui Airport ram hralhna cheng vbc 117.9 atanga 'mantang eitu list' puangzar turin Chief Minister hnenah ngenna an thlen a. CBI hnenah General Consent pe turin an ngen bawk.
2. ZPM Media Chairman, Revenue Minister Pu B Lalchhanzovan Lengpui leh Sihphir ram, Indian Air Force hnena hralh chungchang chhui tura CBI hnena FIR thehluh an tum chu Congress party-in CBI Unitah FIR an thehluh tho avangin an thulh leh a ti.
3. BJP Mizoram President Dr K Beichhua an Mizoram tana Central Sorkar atanga sum hmuh tur a pung hian, VIKSIT BHARAT 2047 an thlir tel a ni tih a ti chianga ngaih a ni a ti.
4. Prime Minister Narendra Modi chuan vawiin hian ni hnih cham turin Malaysia a tlawh dawn.

<><><>

LENGPUI LAND SCAM ISSUE-CONG

Mizoram Pradesh Congress Committee MPCC chuan Lengpui Airport ram hralhna cheng vbc 117.9 atanga 'mantang eitu list' puangzar turin Chief Minister hnenah ngenna an thlen a. CBI hnenah General Consent pe turin an ngen bawk.

Congress party Vigilance Cell chuan nimin khan Chief Minister hnenah lehkha thehlutin, IAF hnena Lengpui ram hralhna man, a ram neitu pawh nilo, cheng vbc 117.9 dawngtu a puh Henry Lalremsanga Hlawnmual pawisa dawn atanga 'mantang eitu list' chu mipui hriatah puangzar se an ti a, an thu thehluh ah hian Indian Air force (IAF) in ram an leiah, a ram neitu Pu Rohmingliana'n vbc 70 ram hralhna man a tel laiin, ram pawh nei miahlo Pu Henry Lalremsanga Hlawnmual-in vbc 117.9 Lengpui ram hralhna man a tel thung niin an sawi a. Ram neitu nilo Pu Henry Lalremsanga Hlawnmual-in ram hralhna atanga a dawn vbc 117.9 chu sorkara thil tithei tak takte hnena sem tur thahnem tak a awm thu lo darh ta chu chhui chiang a, pawisa a sem chhuahna ni ngeia lang, Mantang eitute list dik tak Zoram mipuite hnena puangzar a nih ngei theih nan hma la turin MPCC chuan Mizoram sorkar an ngen tih a tarlang bawk.

Mizoram Congress Party President, Pu Lal Thanzara chuan Indian Airforce hnena Lengpui Airport bula ram hralh chungchang chhui turin a tul a nih chuan Supreme Court thlen an tum tih a sawi a.

Nimina Congress Bhavan-a inkhawmah Pu Lal Thanzara chuan Lengpui Airport bul ram hralh thu-ah a tuihâng hawptu chhui chhuak tura CBI koh luh chauh chu an lungawina a ni lova, an beisei anga CBI in hna an thawk lo a nih chuan, a tul ang zelin Delhi lama AICC hotute rawn chungin Supreme Court-ah an kal zel dawn tih a sawi.

<><><>

LENGPUI LAND SCAM ISSUE-ZPM

ZPM Media Chairman, Revenue Minister Pu B Lalchhanzovan Lengpui leh Sihphir ram, Indian Air Force hnena hralh chungchang chhui tura CBI hnena FIR thehluk an tum chu an thulh leh a ti a,

A chhan chu Congress party-in CBI Unit, Mizoramah FIR an thehluk tho avangin, ZPM PAC thurawn angin an theh lut leh dawn rih lo a ti.

Nimin chawhnu khan ZPM office-ah thuthar lakhawmtute hmaah he thu hi sawiin Pu B.LalChhanzova chuan nimpiniah ni 4-a Council of Minister thutkhawm zawh-a IAF hnena ram hralh chungchang an sawiho thu sawiin, Chief Minister chuan Sorkar laiin FIR thehluk chu a kawng hman lo naa, MNF leh Congress chet an tum loh avangin Media Chairman anihna anga thutlukna siamin, chumi atan chuan inbuatsaihna pawh kalpui nghal niin vawiin tlai dar 2 khan theh lut turin an inpeih fel tawh tih a sawi.

ZPM in FIR thehluk an tum thawm an hriat avangin MNF leh Congress Party chu an che chawp chung chung niin a sawi a, MNF Party-in kalhmang lo deuha CVO hnena an thehluk chuan thehluk an la tum a, amaherawhchu Congress Party in CBI hnenah ngei an thehluk tak avangin ZPM PAC chuan thehluk ve rih loh a rel ta a, Zoram mipui sutthlek enin thehluk ve te pawh a la tul thei a ti.

ZPM Media Chairman chuan Congress in complaint an thehluk chu CBI in chak taka hma la a, sorkarah consent a rawn dil chuan ZPM chu engtik hunah pawh che chhuak turin an in peih a ti a, sorkar pawh che tura ngaih a nih thu a sawi bawh a, Pu B Lalchhanzova chuan he thil ah hian hmalak a nih tur thu Chief Minister a hrilhin, Chief Minister chuan a kut a fai a thu leh hlauh a neih loh thu leh hma la mawp mawp tura a hrilh thu a sawi a ni.

<><><>

LENGPUI LAND SCAM ISSUE-MNF

Mizoram Rajya Sabha MP Pu K.Vanlalvena chuan vawiin khan Union Home Minister Pu Amit Shah a hnenah Lengpui ram Indian Air Force hnena hralh chungchanga thil dik lo awm ngeia lang te chhui turin Central Investigating Agency te thu pe tura ngenna a theh lut a.

Pu Vanlalvena chuan Central pawisa IAF te ram leina atana hman a nih dan ah dân bawhchhiatna awm ngeia a lan thu leh diklo taka pawisa dawngtu te chhui chhuak ngei tura a duh thu Home Minister hnenah hian a thlen a ni.

<><><>

MNF- MEDIA

MNF Media and Publicity Board Vice Chairman Pu J. Malsawmzuala Vanchhawng chuan chanchinbumite hnathawhna-a an zalenna leh ethics pawh vawnghim thei lo khawpa nekchep a an awm chu Mizorama la thleng ngai lo a ni a ti.

He thu hi nimin khan MNF party pisa - Mizo Hnam Run chhung inkhawm neih-ah sawiin, PM-USHA hnuaia sum kal fel lo chhuitu Committee on Petitions-in Speaker hnena report an thehluh chungchanga Doordarshan reporter report ziah danah journalist-in zalenna an neih pawh hmang thei lo a an siam chu a dem thu a sawi a. DDK Reporter hian a ti dik lo a nih chuan reporter lakah hian Defamation Case thehlut se, hemi chungchanga chhunhan pakhat pawh ziak veloin an tuar chu na a tihpui takzet tih a sawi a. Sorkar website ah chiang takin, sorkar thuchhuak, a hun leh ni nena tarlan entur awm reng behchhana news report siam hi ngaihhuat tur leh pawisawina a ni lo a ti bawk.

Pu J. Malsawmzuala hian Journalist te zahawmna leh dikna rap bet tu-ah Education Minister a puh a, journalist te zahawmna leh dikna humhim nan, mawhphurhna nei lo jounalist nupui an transfer na order chu sut leh ngei turin a phut tih a sawi a ni.



BJP

Mizoram State BJP President Dr K Beichhua chuan, Union Budget leh Union Budget atanga Mizoram tana hmasawmna sum hmuh tur tlangpui thuthar thehdarhtute nen nimin khan an sawiho a.

Dr K Beichhua chuan Mizoram tana Central Sorkar atanga sum hmuh tur a pung hian, VIKSIT BHARAT 2047 an thlir tel a ni tih a ti chiang hle-a a ngaih thu a sawi a, Mizoram tana tihhlawhtlin tawh leh kal mekte tarlangin September ni 13 2025 khan Prime Minister Pu Narendra Modi chuan hmasawmna hnathawh tur Lungphum cheng Vbc 9000 aia tam man a rawn phum a, hei hian railway, kawngpui, energy, sports leh inkalpawh nate a huam a ni a ti.

June ni 30,2025 thleng khan National Highway kawngpui km 1,499 aia thui siam a ni. National Highway km 593-a thui siamna tura ruahman Vbc 11,465 pawm tawh a ti a. September ni 13 khan Prime Minister chuan Bairabi-Sairang rêl kawng thar a rawn hawng a, Indian Railways network chuan a vawikhat nan Aizawl a rawn thlunzawm ve ta a ni a ti. Sairang Railway Station (Aizawl) chu Amrit Bharat Station Scheme hnuaia siamthat leh mek a ni tih a sawi.

Dr Beichhua chuan, Kum 2025 khan kan Prime Minister chuan zirna in tha leh changtlung tak a neih theih nan Residential School, Kawrthah leh Eklavya Model Residential School, Tlangnuam chu a rawn hawng bawk tih sawiin. Khelo India Multipurpose Indoor Hall for Sports Development Tuikual a mi chu lungphum a phum a, thalaite'n infiamna lama tunlai thei ang ber bungrua tha tak takte nena an in zirchhuah theih nana buatsaih a ni a ti.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modi chuan vawiin hian ni hnih cham turin Malaysia a tlawh dawn.

Malaysia Prime Minister Anwar Ibrahim-a sawmna bawhzuiin Prime Minister Narendra Modi hi Malaysia - ah a zin dawn a. A cham chhung hian ram pahnih te inkarah insumdawn tawna chungchangte, venhimna hrang hrangte bakah kawlpheha leh tuipei lam venhimna kawnga hmalakna leh thawhdunna tur hrang hrangte sawiho a ni ang.

Ni hnih a cham chhung hian Prime Minister Narendra Modi chuan 10th India - Malaysia CEO Forum neih tura Malaysia a company lian ho te a kawm dawn a, hei bakah hian Malaysia-a India khua leh tui awmte a kawm nghal dawn a ni.

<><><>